



志小覽遊州廣

著禎士王

Am. Mus. 802

本館據學海類編  
本排印初編各叢  
書僅有此本

# 廣州遊覽小志

清 濟南王士正貽上著

## 光孝寺

光孝寺。又名法性寺。在粵城西北。越王建德故宅也。孫吳虞翻居此。手植訶子。因名虞苑。又名訶林。東晉隆安五年。罽賓國曇摩耶舍尊者駐錫。曰王園寺。劉宋永初中。求那羅跋陀三藏始創戒壇。梁天監元年。智藥三藏自西竺來。植菩提樹壇前。預識曰。後一百七十年。有肉身菩薩于此樹下開演上乘。達磨初入國中。亦止此寺。其後五傳至惠能。遂開東山法門于此。今祝聖殿曇摩遺跡也。有米元章書三世佛名。稍北爲六祖殿。前爲菩提壇。壇側爲髮塔。其東南爲達磨井。西爲五祖殿。循廊而東。爲風旛堂。堂前有池泓然。又東有僞漢鐵塔。上有題記。稱大漢皇帝大寶十年。四角有沙門某某題名。繫銜皆金紫大夫。檢校工部尚書。又東爲譯經臺。洗硯池。房融筆授首楞嚴處。西廊復有一塔。規製差小。題玉清宮使德陵使龍德宮使開府儀同三司內侍監上柱國龔澄樞。同女弟子鄧氏三十二娘。及大寶六年歲次癸亥字。粵城內外古道場。以光孝爲第一。氣象古朴。殊乎他刹。六朝已還。名僧居此者。曇摩耶舍。求那羅跋陀。智藥三藏。初祖六祖。印宗法師。波羅末陀。陳刺史歐陽頤請譯佛阿毗曇經。金剛般若經。無上依經。佛性論。共四十部。般刺密諦。譯楞嚴者。仰山通智禪師。憨山德清法師。天然函巽禪師。同遊黃太史忍菴。高廷評。罽園屈翁山。陳元孝。張超然。三處士。程燕思秀才。人賦五言詩。

六榕寺

淨慧寺。舊名寶莊嚴寺。蘇長公南遷過此。書六榕二大字。因名六榕寺。今寺額卽蘇書也。寺有舍利塔。梁大同中。沙門曇裕建。舊有唐王勃碑。宋紹聖間。寶雞主簿林修重建。宗室康州刺史叔盎撰文。塔九層。高二十丈。廣六丈。有奇。中藏佛牙舍利。當修重建時。掘得巨鼎。藏劍三。鏡一。同舍利瘞之。元至正間。又增寶珠銅柱之屬。憑高眺遠。則白雲粵秀諸峰。皆在襟帶也。寺有永嘉禪師證道歌石刻。禪師謁六祖。祖歎曰。善哉。少留一宿。宗門謂一宿覺。

五羊觀

五羊觀。在城中西南坡山上。有穗石洞。五仙祠。吳立夫南海古蹟記云。楚高固時。有五仙人。人持穀穗。一莖六出。乘羊衣。羊具五方色。遺穗州人。今祠中五石。云是羊化。殊不類。祠後有崇臺。可以眺遠。其東爲三元殿。殿前有池。片石陂陀。一泓出其中。旁有石刻。曰仙人足跡。傅會可笑。洪文簡公少讀書于此。有詩刻石。同遊者。庭表。曼園翁山。元孝。超然。燕思。光孝寺僧月濤。南柄。

海幢寺

海幢寺。在羊城南。下瀕江水。同庭表。翁山。元孝。蒲衣。往遊。冒雨發舟。二里抵寺門。木縣方花。望如赤城之霞。寺有鷹爪蘭。林藤本。大兩圍。幹枝相糾。花五出。初出綠色。久之漸黃。香與魚子蘭酷似。寺故郭氏園。蘭園中故物也。有藏經閣。極偉麗。北望白雲。粵秀。西望石門。靈峰。西樵。諸山。東眺雷峰。卽往波羅道也。南

爲花田。南澳葬宮人處。素馨花產此。寺爲僧。今無所建。龍象莊嚴。甲諸刹。然無他奇。稍宜登眺耳。食罷登舟。往海珠寺。

### 海珠寺

海珠石在江中。上有慈度寺。宋李侍郎昂英讀書處。寺有李公祠。面丹霞臺。下瞰江水。北帶羊城。估舶漁艇。往來如圖畫。爲粵人競渡之所。明盛時。豪家競以翠毛、鶴毳、孔雀尾飾船篷。用相誇尙。其侈靡如此。用兵後。築城置戍其上。荒落不復振矣。有吳道子石刻觀音像尙存。舟由濠水入魚藻門。劉鋹時。有稻田自海上浮來。布衣林楚材見而嘆曰。水魚湫湫兮。南及宋師。至潘美爲帥。人始悟爲潘字云。飲濠梁別業。晤梁秀才無技。

### 越秀山

越秀山在廣州府城北。城堞因山。山分爲二。東爲歌舞崗。越王臺。其西爲觀音閣。山半爲呼鸞道。僞漢劉龔故蹟也。城西爲朝臺山。南越志云。傍江構起葦館。以送陸賈。因名朝臺也。古蹟記云。山巔有達磨泉。山踞粵城最高處。憑高下瞰。遠江如帶。目盡炎海。粵人三月三日。九月九日。多遊于此。城堞間多榕樹。木絲。時暮春。木絲方花。紅照天外。亦一奇也。

### 蒲澗寺

三月初四日。勞書升憲副。約同忍菴、曼園、元孝。遊蒲澗寺。寺在白雲山麓。氣象疏古。寺門諸山環抱。門內

二石碣。刻宋蘇文忠公詩。崔清獻公詞。坐禪人大韶範成妙叶堂。始食蕉子。羊桃。菖蒲澗在寺左。太平寰宇志云。菖蒲澗一名甘溪。南越志云。交州刺史陸允之所開也。襄陽羅友累石澗側。容百人坐。古蹟記云。南漢闢甘泉苑。南有陸公亭。夾溪刺桐。木絲。花開。殷豔如畫。時久旱。細流涓涓。出石罅中。小魚如秧針。千百爲羣。東上。尋濂泉寺。半里許。得石澗。潺湲有聲。涉澗而東。樹益蒼蔚。水聲益清激。又半里。復涉澗而西。澗中巨石。欹立。騰倚。類多姿致。岸皆笏竹。竹盡得寺。寺數弓。而朴雅絕塵。老僧興默居之。元孝言。郡人陶璜。苦子前身。寺僧道安也。因言其從父陳公慧業。記前生爲廬山僧事甚奇。寺去濂泉尚里許。衆疲飢。不能登。坐澗石。蔭竹樹。俯聽水聲。如鳴琴。筑下山。遠見琵琶洲。洲上浮圖巋然。海鼇寺也。歸食寺門榕下。是日甚暑。清風洒然。山相傳爲安期生得道處。上有景泰寺。安期祠。

長壽菴

長壽菴。在西郭外。勸于萬歷間。禪人大汕重新之。汕能詩畫。營造有巧思。寺西偏有池。通珠江水。增減應潮汐。池北爲半帆。循廊曲折而東。爲繪空軒。軒前佛桑。寶相。諸花。叢萃可愛。由半帆竝池而南。綠岸皆荔支。龍眼。池之南。爲懷古樓。高明洞豁。其下爲離六堂。水木清華。房廊幽窈。如吳越閒寺。有拈花釋迦像。飾以黃金。珠玉。車璫。瑪瑙。瑟瑟之屬。莊嚴妙好。又有銅像。云是唐鑄也。

南園三忠祠

大忠祠。祀宋文信國。陸丞相。張越國。三公。其東。祠南園五先生。五先生者。孫典籍。黃待制。哲。王給事中。

佐趙御史介、李長史德。明初結詩社于南園。此其遺址。崇禎戊寅。巡按御史葛徵奇葺三忠祠。并鉦五先生詩于版。久之皆廢。同年彭吏部襄爲番禺令。復新之。祠有池閣。背枕河流。亦一勝地。